

DIE GROOT TREK: HOE GROOT?

Prof P H Kapp

Dept Geskiedenis

Universiteit van Stellenbosch

Gebeurtenisse wat 'n wending aan die geskiedenis gegee het, is heel dikwels die onderwerp van intense debat. Daardeur word die dinamiese karakter van die gebeure erken en word by implikasie daaraan 'n besondere plek in die geskiedenis toegeken. Die herdenking van die Groot Trek vestig opnuut weer die aandag op hierdie stuk geskiedenis en skep die geleentheid vir standpunt- en stellinginname. Die onderwyser wat vir sy leerlinge die Groot Trek in sy werklike historiese perspektief wil plaas, word daarom met 'n reeks sogenaamde interpretasies gekonfronteer en hy moet vir sy leerlinge leiding gee en 'n koers aandui. Hierdie artikel is met die oog daarop geskryf en nie met die doel om die Groot Trek as sodanig te behandel nie.

Soos te begrype verskuif die navorsingsfokus oor aspekte van die geskiedenis na mate op nuwe vrae en probleme toegespits word. In die afgelope twee dekades het navorsing oor die tydgenootlike gebeure van die Groot Trek die aandag gevestig op die geskiedenis van die binneland van Suid-Afrika in die periode voor die Groot Trek. Ander navorsing oor die persona's van die Voortrekkers en die tweede golf van Voortrekkers wat op die sport van die eerste groep Voortrekkers gevolg het, het nuwe insigte in die voorbereiding en beplanning van trekkers en in die verskillende motiewe waarom individue getrek het, gebring. Biografiese studies oor Erasmus Smit, Andries Pretorius en Sarel Cilliers het in meer besonderhede op 'n aantal aspekte waarby hulle betrokke was, ingegaan. In 'n evaluering van die werklike betekenis van die Groot Trek moet nuwe insigte wat deur hierdie navorsing na vore gebring is binne die totale konteks van die beeld van en insig in die Groot Trek oorweeg word. In 'n artikel van beperkte omvang soos hierdie kan daar egter nie op fynere besonderhede ingegaan word nie en kan volledigheid nie bereik word nie.

1. Belangrike agtergrondaspekte

Trekbewegings was deel van die Suid-Afrikaanse geskiedenis. Kleiner en groter groepe was op verskillende tydstippe in die geskiedenis op trek en om te trek was vir al die bevolkingsgroepe, uitgesonderd die gevestigde Wes- en Suid-Kaapse bevolking, teen die begin van die neentiende eeu 'n bekende lewenswyse. Daarom is dit belangrik om te beklemtoon hoe die Groot Trek van die ander trekbewegings verskil. Die Groot Trek was 'n georganiseerde, gekonsentreerde en gemotiveerde emigrasie van Afrika-nergrensbewoners uit die Oos- en Noordoos-Kaap met die bedoeling om nooit weer na die Kaapkolonie terug te keer nie en 'n permanente vestiging(s) in die binneland tot stand te bring. Die feit dat mense wel teruggekeer het en dat ander groepe later na die Transoranje verhuis het, verander nie die wesenlike aard van die Groot Trek nie.

Omdat die Groot Trek in afsondering en as 'n vertroulike onderneming onder grensbewoners beplan is, was daar uit die aard van die saak geen openbare propaganda vir die onderneming nie. Bronne en inligting is baie beperk en ontwikkelinge het dikwels op 'n sporadiese en persoon-vir-persoon basis geskied. Daarom stem geskiedskrywers nie altyd saam oor wanneer die Groot Trek begin of eindig nie, wie daarby betrokke is en waarop gekonsentreer moet word nie. Die tydperk 1834-1840 verteenwoordig die hoogtepunt van die Groot Trek, hoewel daar ná 1840 nog trekgeselskappe na die Transoranje beweeg het. Presies hoeveel mense aan die Groot Trek deelgeneem het, is om begryplike redes ook 'n saak vir groot verskil van mening. Die minimum getal wat vermeld word, is 10 000 met 15 000 waarskynlik 'n goeie gemiddelde. In reële terme is dit nie 'n groot getal mense nie, maar in verhouding tot die tota-

le blanke oosgrensbevolking was dit 'n baie beduidende getal mense wat vir die ekonomie en die veiligheid van die oosgrens 'n groot verlies was.

Die term Groot Trek en die benaming Voortrekkers, soos met talle belangrike historiese gebeure, het eers veel later as die gebeure self in gebruik gekom. In die wetenskapstaal sal gesê word dit is veralgemenende terme of konsepte wat ontwikkel is om die bepaalde verskynsels te beskryf. Die tydgenootlike term wat gebruik is, was emigrante-boere of landverhuisers. Dit is eers ná 1870, toe besef is dat hierdie beweging iets groter en meer betekenisvol as as die normale trekbewegings van die tyd, dat die begrip Groot Trek in gebruik gekom het en dat besef is dat die Voortrekkers 'n ander band met die gebeure het as die natrekkers wat hulle later in die Voortrekkergebiede gevestig het.

Daar moet ook 'n duidelike onderskeid gemaak word tussen die trekboerbeweging en die Voortrekkers hoewel die oorgang van 'n trekboer na 'n Voortrekker gemaklik en onopmerklik kon geskied. Die trekboere was veeboere wat oor die grens na veral die Transoranje beweeg het ter wille van water en weiding.

Teen 1844 was daar waarskynlik ongeveer 1 500 van hulle tussen die Oranje- en die Modderiviere gevestig. Sommige het hulle verblyf as bloot tydelik beskou, terwyl ander plase van die Griekwas gekoop het en hulle permanent gevestig het. Hulle het mettertyd meer georganiseerd geraak en vir M.A. Oberholzer as hulle leier aanvaar. Die groot verskil tussen hulle en die Voortrekkers was die feit dat hulle lojale Britse onderdane was wat gretig was dat Brittanje sy gesag oor die gebied noord van die Oranjerivier moet uitbrei. Hulle het dan ook 'n petisie in dié verband aan die Britse regering gerig en het die anneksasie van die gebied in 1848 as die Oranjerivier Soewereiniteit verwelkom.

Die feit dat die Voortrekkers oorwegend Afrika-nergrensbouers was, laat die vraag ontstaan hoekom ander Afrikaners en Engelse Setlaars nie ook aan die Groot Trek deelgeneem het nie, hoewel enkele gesinstreke uit ander dele as die grensgebiede en selfs uit die Boland getrek het. Drie faktore het meegebring dat hulle nie by die Groot Trek betrokke kon raak nie. Eerstens het die gevestigde landbouers op die graan- en wingerdplase dit veel moeiliker gevind om hulle belange in die produksie en bemarking van hulle produkte prys te gee vir die veel meer onsekere en rustelose bestaan van 'n veeboer. Tweedens was hulle ook nie mense wat gewoond was aan 'n mobiele lewenswyse nie. In die derde plek het hulle nie die Sesde Grensoorlog en sy gevolge beleef nie. Hulle het hulle eie probleme en klagtes gehad veral oor die behandeling wat hulle met die vrystelling van die slawe ontvang het en hulle ontevredenheid met die Kaapse en Britse regerings se pogings om deur wetgewing die arbeidsverhoudinge te reël. Hulle was egter politiek relatief onbetrokke en ongemotiveerd en die groeiende ontevredenheid sou eers met die stigting van die Boere Beskermingsbond (1879) vorm begin aanneem.

Vir die Britse Setlaars was wegtrek geen lewensvatbare opsie om van hulle probleme ontslae te raak nie. As nuwelinge was hulle met die mobiele lewenswyse onbekend en het hulle nie die Voortrekkers se strewe om weg te kom van die Britse gesag gedeel nie. Hoewel hulle ook baie ontevrede was met die herroeping van sir Benjamin D'Ur-

ban se grensbeleid, was hulle protes gerig teen die onbillike invloed van die "anti-colonial party" (dr. John Philip, John Fairbairn en die sogenaamde filantropiese faksie) en nie teen Britse gesag as sodanig nie. Verder moet in gedagte gehou word dat heelwat van hulle 'n ander trek beleef het: weg van die plase na die dorpe waar hulle hulle eertydse ambagte gaan beoefen het of handelaars geword het. Hulle politieke frustrasie sou eerde in die afskeidingsbeweging in die oostelike distrikte en selfs in die agitatie vir 'n stelsel van verteenwoordigende regering uitdrukking vind.

Hoeveel slawe en Khoikhoi die Voortrekkers as arbeiders, handlangers en veewagters vergesel het, is nie bekend nie. Dat hierdie mense grotendeels gelukkig en tevrede was om by die Voortrekkers te wees, blyk uit die feit dat so min van hulle gebruik gemaak het van die geleentheid om na die Kaapkolonie en die Britse gesag terug te keer. Die Kaapse regering het heelwat moeite gedoen om hulle geleentheid te bied om terug te keer. Dit is veral as wadryers en veewagters wat hulle 'n rol gespeel het, maar dit was altyd die passiewe rol van meedoeners. Hulle het geen sleutel- of bepalende rol in die verloop van die Groot Trek gespeel nie, hoewel hulle deur hulle arbeid 'n bepaalde bydrae gelewer het.

2. Redes vir die Groot Trek

Die debat oor die redes vir die Groot Trek sal nie maklik finaliteit bereik nie omdat botsende vertolkings die klem op verskillende sake plaas. Die argument dat die Groot Trek net 'n versnelde voortsetting van die trekboerbeweging is, voer grondhonger as die vernaamste rede vir die Groot Trek aan. Dit berus in werklikheid op Andries Stockenström se tydgenootlike beoordeling van die Groot Trek vanuit die beperkte insig wat hy as 'n amptenaar op die werklike aard, omvang en inhoud van sake gehad het. Die argument dat dit 'n protes teen die vrystelling van die slawe was en 'n strewe om mag oor die inheemse stamme te kry, spruit voort uit dr. Philip en sy groep se beoordeling van die Groot Trek. Hulle kon nog minder as Stockenström op werklike persoonlike kennis van die Voortrekkers se motiewe en gedagtes aanspraak maak. 'n Derde interpretasie wat van 'n meer resente oorsprong is, is dat dit eintlik die arm en ekonomies onstabiele grensbewoners was wat weggetrek omdat hulle daardeur die minste sou verloor. In hierdie vertolking word veral van individuele mededelings deur trekkers gebruik gemaak ter staving van die argument. Wat hierdie vertolkings in gemeen het, is dat hulle die bestaan van werklike politieke motiewe vir die Groot Trek ontken of baie sterk onderbektom. Hulle lê veral klem op die min duidelike uitsprake oor 'n vryheids- en republikeinse strewe by die Voortrekkers.

Uit die aard van die saak sal mense wat in sulke groot getalle weggetrek het, uiteenlopende individuele redes gehad het waarom hulle tot so 'n stap oorgegaan het. Dit neem egter nie die feit weg dat hulle hulle met die oorkoepelende doel van die beweging soos deur Retief in sy bekende Manifest verwoord, vereenselwig het nie. 'n Veel belangriker toets vir hulle werklike motiewe moet egter in hulle daad gesoek word. Vanaf die eerste samekoms langs die Modderivier (Maart 1837) was dit duidelik dat dit hier om 'n georganiseerde poging gegaan het om juis aan die idee van vryheid en selfbeskikking uitdrukking te gee. Die feit dat daar geen klankklare en onomwonde republikeinse instellings tot stand kom nie, is geen bewys dat hulle nie na republikeinse onafhanklikheid strewe nie. Die worsteling om aan die idees en strewes uitdrukking te gee spreek duidelik uit die eerste bestuursreëlings en uit die Nege Artikels. Dit word uiteindelik bekroon met die stigting van die Republiek Natalia (Maart 1839) en die Suid-Afrikaanse en Vrystaatse Republieke later.

Die Groot Trek was 'n vreedsame protes teen Britse gesag en beleid soos dit veral op die oosgrens tot uitdrukking gekom het. Dit het uitgegroei tot 'n sterk republikeinse

onafhanklikheidsbeweging wat as sodanig groot invloed op die Suid-Afrikaanse geskiedenis sou uitoefen. Die feit dat daar so vroeg as 1829-1830 al onder grensboere druk gesprek oor wegtrek gevoer is, toon ook dat dit geen impulsiewe daad was nie. Die Kommissietrekkers van 1834 wat die binneland gaan verken het, dui op sorgsame en deeglike voorbereiding. Die Sesde Grensoorlog (1834-1835) het die laaste stimulus gebied vir 'n gedagte wat reeds wortel geskied het.

Dit sou vreemd gewees het as die Groot Trek net in 'n gees van harmonieuse samewerking verloop het. Geen groot historiese gebeurtenis word deur 'n gees van eendragtigheid gekenmerk nie. Die ernstige botsings oor die trekroete, oor die militêre strategie wat gevolg moes word en oor leierskap was 'n natuurlike ontwikkeling. Die Voortrekkers was per slot van sake geharde pioniers wat gewoon was aan 'n individualistiese lewenswyse waar elke man op sy eie goeie oordeel en vermoëns moes staatmaak. Om so 'n groep mense tot 'n span saam te snoer was 'n gedugte taak. Daarom is die verbasende nie dat daar verdeeldheid was nie, maar dat so sô 'n mate van eenheid geskep is as wat wel die geval was.

3. Die betekenis van die Groot Trek.

Die Groot Trek was 'n groot gebeurtenis in die geskiedenis van Suid-Afrika. Dit sou nie reg wees om dit as die mees sentrale gebeurtenis te beskryf nie omdat dit 'n graderingskaal vir gebeure impliseer. Dit is egter korrek om dit as 'n sentrale gebeurtenis te beskryf waaronder die Suid-Afrikaanse geskiedenis gans anders sou verloop het. Benewens 'n hele aantal newegesigte invloede wat die Groot Trek uitgeoefen het, kan sy betekenis vir die Suid-Afrikaanse geskiedenis in vier hoofpunte saamgevat word.

1. Die Groot Trek het die binnelande van Suid-Afrika vir ontwikkeling en beskawing oopgestel. Paaie na die binneland is oopgestel, handelsmoontlikhede is geskep, sentrums vir dorpsontwikkeling is ingerig, 'n mark vir die arbeid en die produkte van inheemse stamme is geskep en 'n proses is aan die gang gesit wat nie weer omgekeer kon word nie. Die Voortrekkers het veral veiligheid en stabiliteit gebring in 'n gebied wat 'n dekade of twee vantevore die toneel van intensiewe stamoorloë en verwoesting was. Heelwat stamhoofde het met die terugkeer van veiligheid ook na hulle eertydse woongebiede teruggekeer. Op die spoor van die Voortrekkers het handelaars, sendelinge en ander pioniers en avonturiers gevolg.
2. Die Groot Trek het in belangrike opsigte die nuwe grense van Suid-Afrika getrek. Natal, die Oranje-Vrystaat en Transvaal het binne die geografiese konsep van die moderne Suid-Afrika gekom. Dit het meegebring dat die oosgrensvraagstuk versesvoudig is omdat in al drie gebiede nuwe grense getrek is. Dit het tot nuwe grensoorloë en verdere uitbreiding ten koste van Swart volke gelei. Die uitbreiding het 'n mededinging om mag en grondgebied geskep, maar ook tot die reservering van spesifieke gebiede vir die Swart volke gelei. Dit het ook Britse inmenging en die anneksasie van Basoetoeland, Zoeloeland, Swaziland en Betsjoeanaland tot gevolg gehad. Die proses van vestiging vertoon dieselfde kenmerke as soortgelyke prosesse elders: die sterkere het sy stempel op gebeure kon afdruk. Morele maatstawwe en oordele in die vloeibare situasie in die binneland is riskant. Die reg was nie alles aan die een kant en die onreg aan die anderkant nie. Baie Swartes het hulle grondbesit verloor, maar in baie gevalle was hulle eie historiese aansprake ook nie sterk gevestig nie.
3. Die Groot Trek het republikanisme as 'n politieke strewe in die Suid-Afrikaanse geskiedenis gevestig. As sodanig het die Voortrekkers in die voetspore van die Amerikaanse koloniste gevolg en die republikeinse idee in Afrika gevestig. Ná 1957 sou die een Swart staat na

die ander die republikeinse stelsel aanvaar. Maar die ware betekenis van die republikeinse strewe lê veel enger, naamlik in die rol wat dit sou speel in die ZAR en die OVS in die ontwikkeling van 'n nasionale bewussyn en strewe by die Afrikaner.

4. Die Groot Trek het ook die weg gebaan vir die vestiging van blanke oorheersing en mag in Suid-Afrika. Die twee veldslae van Vegkop en Bloedrivier het die mag van Mzilikazi en Dingane beëindig. Mosjeswe se mag is nie gebreek nie, maar sy magsbasis is ingeperk. Die oorloë wat sou volg teen die Basoeto's, Bavenda's, Shangaans, Swazi's en ander was juis die gevolg van die vestiging van 'n blanke mag in die binneland en die mededinging om skaars hulpbronne wat daaruit voorgeloei het. Nie een van hierdie volke is totaal verdryf nie en elkeen het ten spyte van verlies van grondgebied waarop hulle aanspraak gemaak het, die hartland van hulle magsbasis behou. Die onderlinge oorloë is ook grotendeels beëindig wat 'n tydperk van groter stabiliteit in die binneland tot gevolg gehad het.

5. Die Afrikaner en die Groot Trek

In die Afrikaner se geskiedbeeld het die Groot Trek 'n besondere plek ingeneem. Saam met die Anglo-Boere-oorlog is dit as die twee sentrale momente in die Afrikaner se volksgeskiedenis beskou omdat dit die opkoms van Afrikanernasionalisme en sy stryd teen Britse imperialisme sou versinnebeeld. Die Groot Trek is in belangrike opsigte geromantiseer. Die jaarlikse herdenking van die Slag van Bloedrivier en die Gelofte het 'n belangrike plek in die volkslewe ingeneem. Dit het meegebring dat die invloed van die Groot Trek in die Afrikaanse volkslewe veel wyer geloop het as die oorspronklike historiese gebeure.

Die opkoms van 'n nasionalisme by Swart volke en die sterk groei van die Zoeloe se kultuur- en identiteitsbewustheid het al hoe meer die aandag op hulle vertolking van die Groot Trek en spesifiek Bloedrivier en die Gelofte gevestig. Aan die een kant het dit tot skerp kritiek op die Groot Trek en die Afrikaner se beleving daarvan gelei. Aan die ander kant is al hoe meer gesoek na 'n nuwe raamwerk om die Groot Trek en sy betekenis te ontromantiseer. So word vandag byvoorbeeld veel minder klem op die veldslag van Bloedrivier en op die ou Dingaansdag gelê en word die aandag toegespits op die besondere betekenis van die Gelofte as 'n daad wat nie teen die Zoeloes as sodanig gemik is nie, maar as iets wat ook 'n universele boodskap dra: die erkenning van die mens se afhanklikheid van God. 'n Ander raamwerk is dié wat klem lê op die sogenaamde mites van die Groot Trek wat in die Afrikaner volkslewe opgeneem sou wees. Die vernaamste hiervan kan soos volg saamgevat word:

- ★ Sarel Cilliers is nie die held van Vegkop, die vader van die Gelofte of die verhewe heldefiguur wat hy voorgeloei is nie.
- ★ Die Slag van Bloedrivier was nie 'n deurslaggewende gebeurtenis in die geskiedenis van Suid-Afrika nie—dit het nie die lot van die Groot Trek of die toekoms van die Afrikaner bepaal nie en kan nie as 'n goddelike beskikking beskryf word nie.
- ★ Die Gelofte is net bindend op die nageslag van diegene wat dit afgelê het en is dus nie iets wat die Afrikaner as sodanig onder 'n verpligting plaas nie. Die huidige teks van die Gelofte is ook nie die oorspronklike teks nie. Die feit dat die Sabbatwette op Gelofte-dag van toepassing gemaak is in die vyftigerjare is strydig met die beginsel van die Sabbatserkenning en met die Gelofte self. Die Gelofte het nie vereis dat 16 Desember as 'n Sabbatdag beskou moes word nie.
- ★ Die Afrikaner word daarvan beskuldig dat hy Bloedrivier en die Gelofte so interpreteer as sou dit bewys dat God aan die Afrikaner se kant is en dat dit hom die reg gee om oor ander te heers.
- ★ Nóg Sarel Cilliers as persoon nóg die Voortrekkers in

die algemeen het die gees van die Gelofte nagekom want hulle het nie sendingwerk onderneem om daardeur die verspreiding van die Christendom aan te help nie.

By 'n oorweging van hierdie argumente moet 'n mens waak daarteen om in 'n pedantiese interpretasie van historiese gebeure te verval. Dit gebeur veral wanneer 'n mens ontromantisering van die geskiedenis ter wille van mitologiejag wil toepas. Die waarheid in die historiese wetenskap vereis daardie belangrike vermoë om 'n gebeurtenis in sigself en in sy totale konteks te begryp. Dit impliseer 'n totale en verantwoorde verstaan binne die perke van die historikus se eie en tydenootlike raamwerk. In die mate waarin dié proses 'n historiese gebeurtenis in sy ware en volledige historiese konteks plaas, lewer dit 'n belangrike bydrae om 'n gebalanseerde perspektief op die gebeure moontlik te maak. Die gevaar is egter ewe groot dat so 'n poging eerder tot 'n proses van bewuste ontlustering kan lei.

In die pogings tot 'n hervertolking van die Geloftegebeure word gegewens té selektief en eensydig vertolk. Terwyl dit waar is dat vroeë geskiedskrywers 'n oordrewe beeld van leiers soos Piet Retief, Andries Pretorius en Sarel Cilliers geskep het, is die pogings om 'n beter perspektief te stel te sterk op 'n afkraking van hierdie persone ingestel. Die swakhede en tekortkominge wat byvoorbeeld ten opsigte van Sarel Cilliers uitgewys word, verander eintlik niks wesenlik aan sy plek en rol nie. 'n Gebalanseerde oordeel sou eerder die klem op sy prestasie te midde van gewoon-menslike gebreke lê as op 'n verkleining van die persoon self.

'n Aanspraak dat Bloedrivier die toekoms van die Afrikaner bepaal het, is in alle geval 'n onhistoriese aanspraak. Dat dit 'n belangrike rol in die ontplooiing van die Groot Trek gespeel het, is 'n feit. Om egter kategories te beweer dat dit die triomf van die Christendom of die sukses van die Groot Trek verseker het, is 'n oordrywing wat nie standhou nie. Dit verander egter niks aan die wesenlike waarde en betekenis van die gebeurtenis nie.

Dit is sekerlik nie die taak van die historikus om hom uit te spreek oor die vraag of sekere gebeure in die geskiedenis wonderwerke van God is of nie. Sy taak is beperk tot 'n korrekte feitlike weergawe en 'n verantwoorde verklaring van gebeure. Dit ontnem egter nie gelowiges die reg om te glo in God se ingryping in die geskiedenis nie. As die individu dit aangaande sy eie persoonlike lewe kan en mag glo, is dit sekerlik nie vreemd dat 'n volk dit oor iets uit sy geskiedenis sal glo nie. Maar so 'n oortuiging mag nooit by die gelowige tot selfverheffing lei nie maar eerder tot nederige erkentlikheid.

Die aanspraak dat die Voortrekkers nie as verspreiders van die Christendom opgetree het nie omdat hulle geen sendingwerk gedoen het nie, doen vreemd aan. Dit hou nie rekening met die feit dat die Voortrekkers self van betekenisvolle geestelike versorging verstoke was nie. Dit gee ook nie erkenning aan die feit dat die stabiliserende rol van die Voortrekkers juis sendingwerk makliker gemaak het nie. Dit misken ook die groot rol wat die Voortrekkers gespeel het om binne die patriargale verband die Christelike godsdiens te versprei onder diegene wat in hulle diens was. Dit is ook in die pioniersomstandighede waaronder die Voortrekkers gelewe het, veel gevaar om dinge van hulle te verwag wat buite hulle vermoë en omstandighede op daardie tyd was.

Die isolering van die Gelofte van die ontwikkeling wat dit in die neëntiende en twintigste eeu deurgemaak het, is 'n ernstige verskaling. Die geskiedenis van die herdenking van Gelofte-dag is die verhaal van hoe die eenvoudige Gelofte van Danskraal tot 'n volkome volksbesit gegroei het wat vir die Afrikaner 'n veel groter en omvattender waarde en betekenis gekry het as wat Andries Pretorius

en Sarel Cilliers ooit kon droom. Wie daarmee nie rekening hou nie, kan nie die diepere invloed en betekenis van die Gelofte na reg begryp nie. Geloftedag is ook nie tot 'n Sabbat verhef nie— die sekulêre sabbatswette is net daarop van toepassing gemaak om die besonder erns en gewydheid van die dag te beklemtoon. Die feit dat die wette ook op Goeie Vrydag en Kersdag van toepassing gemaak is, het ook nie een van hulle tot 'n sabbat verklaar nie.

'n Volk se geskiedenis is nie iets wat met kille, kliniese

sterielheid deur hom beheën word nie. 'n Volk wat dit met sy geskiedenis doen, verlam homself. Opregte waardering en entoesiasme kan egter ook nie op valshede of verdraaiings gebou word nie. 'n Gesonde en waarheidsgetroue romantisering van die geskiedenis is geen sonde nie mits dit op 'n verantwoorde, ewewigtige en gemotiveerde beskouing van die geskiedenis berus. Hiertoe het die kultuuropvoeding van die kind 'n groot bydrae om te lewer. Daarin moet die geskiedenisonderwyser 'n sleutelrol speel. Dit vereis kennis, insig, begrip en beleving.